

# Id ash d Paul Wehpeg O'ohana am Timothy Wui

---

**1** Ni-wehnag Timothy:  
Ia ant ha'ichu wo i m-o'ohani  
ahni Paul mani d kehshaj g Jesus  
Christ. Jiosh at ni-cheha mant wo  
i ahgahi ab amjed g alidaj Jesus  
Christ. T hab ab wo hiwgad g  
hemajkam mat heg am wo ha u'apa  
Jiosh kihdag wui.

<sup>2</sup>Ab g ni-kaiham ahpi Timothy  
map d ni-alidag ab i s-wohochudk  
g ha'ichu ni-ahga ab amjed g Jesus  
Christ.

Ab o wa si s-m-ho'ige'id g t-ohg  
Jiosh g t-kownalig Jesus Christ  
wehm ch ab wo wa ba'ich i  
m-mahkad g i wehmtadag ch s-ap  
tahhadkam.

## Mash am ha'i chum ha iattogid g wohochuddam

<sup>3</sup>Ab ani wa si s-ap m-ahgid  
mapt am wo wih Ephesus t am  
mani wa am him gam hu wo himk  
Macedonia wui. Am g wabsh i  
dakad ch am wo si ha keshwua  
hegam mo g iattogi chum ha  
mashcham. <sup>4</sup>Idam o chum ha  
mashcham mo g hoho'oki a'agida  
ab wehnags g Jiosh ha'ichu ahga ch  
ep chum ha mashcham mat hemho  
wa wo s-chegitok g e-shohshonbad

ha-chechgig. T wabshaba ihda  
ha-mashchama hab wo ha juh mat  
wo dagito g Jiosh hab elida k ab  
wabsh a'ai wo e ne'owinad. Bat  
wa'i masma wo s-mahchk g Jiosh  
hab elida mat ab wo i s-wohoch g  
ha'ichu ahgaj.

<sup>5</sup>Pt wo ha ahgi mat woho ab wo  
s-wohochudad g Jiosh ha'ichu ahga  
ch heg hab wo wa'i junihid mo  
haschu s-mahch mo d s-ap'ekam  
ch hab pi wo e kudutad. Id at  
hab wo ha juh mat wo i ge'eda g  
ha-tatchuidag. <sup>6</sup>Ha'i at dagito g  
e-wohochudadag k hekaj wabsh  
ha wehm e ne'owin. <sup>7</sup>Idam o hab  
chum e elid mo d chehanig ha  
mashchamdum ch wabshaba pi  
amichud g Jiosh ha'ichu ahga chum  
as hab e elid mo s-e mahchk ch  
neneok.

<sup>8-9</sup>S-ap'e o g chehanig. K  
wabshaba idam pi ap hekaj am  
chum ha shohbidch hegam mo hab  
wua g s-ap'ekam. K eda g chehanig  
chum e hekaj mat wo ha shohbi  
hegam mo g pi ap'ekam hab wua.  
Idam o pi ab hu has elid g Jiosh  
ch pi ab hu wohog elid. Ha'ijj o  
s-ha mu'amk chum hems g e-ohg  
o g e-je'e. <sup>10</sup>Ha'ijj o g s-totontom

ha'ichu chegitok ch chum hems chum e u'uwichud o e chechojchud ch e wehm hab junihim g s-uam ha'ichu. Ha'ijj o ha lilsochud wabsh hejel e wehhejed ch ha iattogid ch ab ha'ichu ha abchud g s-ap'ekam o'odham. Nahnko masma o ab wui gegok g mashchamaj g Jiosh hegam mo chum ha mashcham g iattogi. <sup>11</sup>Jiosh o ni-nuhkudachud ihda s-kehg ha'ichu e-ahga. K heg am t-tashogid ihda mant em-ahgi.

**Mash g Paul ab si ho'ige'id g Jiosh**

<sup>12</sup>T-kownalig Jesus oki hab ni-elid mant s-ap am hab wo junihid ihda chickpan nat pi am i ni-kehsh k ab ni-mahkch g gewdag wehhejed. Kuni heg hekaj ab si ho'ige'id. <sup>13</sup>Heki anid hu wa ha sho'igchud hegam mo ab s-wohochud g Jesus ch ab ha wui pi ap has ahg g Jesus. Kut eda heg ab si i s-ni-ho'ige'el nani pi pi ni-mahch ch hab junihim pi ab hu wohochudch. <sup>14</sup>Si at s-hemajim ab ni-wui i e tashogi. Nt hab ab i s-wohochud k ab i ni-hemakoj wehmaj k ab wui a pihk ni-elid.

<sup>15-16</sup>Neh, hema hab che'idag o hab chu'ig, "Ia at jiwia g t-kownalig Jesus jewed dahm mat wo ha do'ibia g pi ap chu'ijkam." K id d si wohokam nat pi ab si s-ni-ho'ige'el. Ni eda shahag wepo mani wa wehs ha ba'iwechkim d si pi ap chu'ijkam mani wa cheggia g t-do'ibiakam Jesus ha sho'igchudch hegam mo ab s-wohochud. T heg ab wabsh ni-bahbgi mat wehs am wo ha chehgi g hemajkam mat ab wabsh wo ha bahbgi. Tp hems hab wa'ap ab wo i s-wohochud k ab wo bei g pi ha huhgedam doakag.

<sup>17</sup>Neh, wehs ha'ichu dahm o d kownal g Jiosh ch pi ta neidagma ch pi hekid im hu hab wo i e juh. Kutt ab wo si uhgk i ulin k ab wo hehgchulidad chum hekid. Neh, woho o wa ihda.

<sup>18</sup>Pegih, ni wehnag, Timothy, heki o hu am i t-tashogid g Jiosh maptki am hab wo junihid ihda chickpan. Kuni ab ep i m-gewkemhun mapt hab wo wa junihid. Hegai Jiosh ha'ichu ahga ab m-wui at hab wo masmak mo g s-kehg cheggiakud. Pt hekaj ab wui kehkkad g ge Jiawul. <sup>19</sup>An g si u'ukchid g e-wohochudadag ch heg hab wo wa'i junihid map haschu s-mahch mo d s-ap'ekam. Ha'ijj oki pi hab masma ch hekaj padch g e-wohochudadag. <sup>20</sup>Hymanaeus ch Alexander oki ha'i hegam ch pi ap has ahg g Jiosh. Nt gam hu i ha dagito ge Jiawul wui mat wo e sho'igchud k atp hems wo dagito g pi ap e-chu'ijig.

**Mat has Masma g wohochuddam ab wo ihmud g Jiosh**

**2** Si ani s-m-ahgidamk mapt wo ha'ichu ha ahgi g t-wehm wohochuddam. Do si ha'ichu mat ab wo e ho'ige'idahunad Jiosh wui. Pt wo ha ahgi mat ab wo tahnid g i wehmtadag ch wo e ho'ige'idahunad am ha wehhejed g wehs nahnko mahs hemajkam. <sup>2</sup>K hab ep mahs mat wo e ho'ige'idahunad am ha wehhejed g kokownal ch u'usagakam mat idam s-ap hab wo junihid g e-chikpan. Kutt hab s-dodolim wo kihdagk ch wo s-ap t-tahtkkad. <sup>3</sup>Neh, id at wo hohho'idach g Jiosh no pi

d t-do'ibiakam <sup>4</sup>ch tatchua mat wehs nahnko mahs hemajkam wo e do'ibia k wo s-mai g wohokam ab amjed.

<sup>5</sup>Do wa'i hemako g t-ohg Jiosh. K hab wa'ap d wa'i hemako g si Kehshaj ch d Jesus Christ ch d wa'i hegai mat i t-hemakoch g Jiosh wehm. Jesus Christ at t-wepo e juh mat d wo o'odhamk <sup>6</sup>ch ab wo bei g s-ko'ok t-namkidadag k hab wo t-do'ibia. Id o am t-chehgidch mo wehs hemajkam s-ha do'ibiamk g Jiosh. <sup>7</sup>Kut heg hekaj am i ni-kei mant wo i ahgahi ab amjed g alidaj k wo ha mashcha g gawul mahs hemajkam g wohokam. S-mahch ap wehs ihda.

<sup>8</sup>Bant wo chei mat wahm g chechoj ab wo e ho'ige'idahunad Jiosh wui ch atp hems am wo uhgk uh'ul e-nohnhoi. S-ap at ha'ichu hab wo elidad ch pi wo sha'i s-bagak ab hedai i wui.

<sup>9</sup>Kunt hab ep wo chei mat g u'uwi wabsh s-ap ab wo e enigadadch ch ep s-ap hab wo juhkchid g e-mo'o mat pi heg hekaj wo chum si e hahaschudad. <sup>10</sup>Ab o ha ab mat chum hekid am hab wo junihid g s-ap'ekam ch heg amjed wo e chehgidch mo d wohochuddam. <sup>11</sup>Ab o d ep ha-wuikam mat wabsh s-bahbagi ch s-dodolim ab wo kaiham k wo mahchid g Jiosh himdag.

<sup>12</sup>Ahni ani pi sha'i ha hiwigid g u'uwi mas wo ha mashcha g chechoj o am ha dahm wo e uh'ulinchid. <sup>13</sup>Ab o ha ab g chechoj mat am wo i ha wanim g hemajkam id eda himdag. Jiosh at wehpeg nahto g cheoj k am haha wabsh

oidk nahto g uwi. Idam ash wa hab chechgig Adam ch Eve. <sup>14</sup>Kush pi d Adambad mat e iattogi. Hegai uwi atsh e iattogid k melchkwua g Jiosh chehanig. <sup>15</sup>T g Jiosh heg hekaj ab ha mah g u'uwi mat wo e sho'igch hekid am i ha mamsijid g a'al. T wabshaba ab ha amjed wo mahsi g t-do'ibiakam. Kut wo e do'ibia matp ab wo s-wohochudad g Jiosh ch wo si pihk e elidad wehs ha hekaj ch wo s-ap'lek ch wo s-e neimakad.

### Matsh has wo chum masmak g ha wanimeddam g wohochuddam

**3** Tatchua o g si s-kehg chickpan hegam matp hedai s-ha wanimelimk g wohochuddam. Neh, id o d hab ha che'idag ch d wohokam. <sup>2</sup>Kunt am wo i em-chegitoch mat has wo chum masmak hegam mo hab s-e junimk. S-ap at d wo o'odhamk. T hab pi hedai wo e nako mas ab wo ha'ichu ha abch. Hemako at wo wa'i hohnigk ch wo si s-e tahtkk wehs ha'ichu k ed ch wo si s-ap hejel e nuhkudad ch s-ap ha'ichu am hab wo junihid ch wo s-chechojimak hegam ha wui matp hedai am wo ha chehgio ha-kihki am. Ab o ha ab mat wo s-mahchk mat has masma wo ha mashcha. <sup>3</sup>Pi o hab chu'ig mas wo nawkko'od o s-hohtam wo babgatad o wo ha kawnid o heg wa'i lial ab wo si tatchuad. <sup>4</sup>S-hemajim at am wo ha dahmk g e-wehm kihkam. T g a'aligaj ab wo wechok ch ab wo si has elidad. <sup>5</sup>Pi at has masma wo s-ap i ha wanim g e-wehm wohochuddam matp pi ap wo ha wanim g e-wehm kihkam. <sup>6</sup>Pi at d wo hema hegamk

mat hemuch ab i s-wohoch g Jiosh ha'ichu ahga nat pi am hu wo chum si e haschudad ch wo i gei hab masma matsh wa g ge Jiawul hab e juh. <sup>7</sup>Heg amt am wo i kei mo chum hems g pi wohochuddam ab si has elid. T hab pi hedai ab hu ha'ichu wo chu'ijigch mas heg hekaj wo i wua g ge Jiawul.

**Mat has wo chum masmak  
g i ha wehmtdam**

<sup>8</sup>T hab wa'ap s-ap d wo o'Odhamk hegam mo am i ha wehmaj g ha wanimeddam. Pt wo ha ahgi mat pi wo chu iattomk ch pi wo nawkko'od ch pi heg wa'i lial ab wo tatchuad. <sup>9</sup>Do si ha'ichu mat am wo si wehs s-ap oidad g Jiosh ha'ichu ahga ch heg hab wo wa'i junihid mo haschu s-mahch mo d s-ap'ekam. <sup>10</sup>Wehpeg amt am wo i ha mamche k am haha wo i ha chuhcha matp s-ap am hab wo masmak.

<sup>11</sup>U'uwi chikpandam at hab wa'ap s-ap d wo u'uwik ch pi wo chu ahgamk ch pi wo nawkko'od ch pi wo chu iattomk.

<sup>12</sup>Idam i ha-wehmtdam at hehemako wo wehm kihkamk ch hab wa'ap s-ap wo ha dahmk g e-a'aliga ch s-ap wo himad g e-kihdag. <sup>13</sup>Hegam mat s-ap hab wo juh g e-chikpan at pi wo has e elid k si s-gewkam am hab wo junihid. Kumt ab wo si has ha elidad.

**Mat haschu am i t-tashogi g Jiosh.**

<sup>14-15</sup>Bani chum ni-tahtk mant s-hohtam am wo i m-chehgim. Tp wabshaba hems pi wo ni-ap'et. Kunt heg hekaj am wo ha'ichu i

m-o'ohani. Kumt id ab wo s-mahchk mamt has masma hab wo e junihid mamt s-ap wo himchudad g Jiosh himdag. Dam Jiosh hemajkamga ch d nuhkuddam g wohokam. <sup>16</sup>Pi o wa ta machima matt has masma wo s-ap'ekamk am Jiosh tahgio. T wabshaba id am i t-tashogi g Jiosh. K d wohokam ihda mo an hab chu'ig ne'i ed:

T-wepo at hab e juh g Jiosh alidag k an e mahsid.

T g Hekia S-ap'ekam Gewkdag am wohokamch mo d s-ap'ekam.

S-ta neidamam at hab e juh, chum hems g anghil ha wehhejed.

S-kehg ha'ichu ahga ab amjed o an e ahgahim nahnko mahs hemajkam ha wui.

T mu'i hemajkam ab s-wohoch. Kut am uhpam ep i bei g Jiosh dahm kahchim wui.

Neh, pi at hedai wo sha'i e nako mas wo pi wohokamch ihda wohokam.

**Mat an ha'i wo i wuwaha mat g  
pi wohokam wo ha mashcha**

**4** Si o tasho am i ni-tashogid g Hekia S-ap'ekam Gewkdag mat ab wo i e ai g tash mat mu'i wo dagito g e-wohochudadag. Ha'i at wo ha mashcha g iattogi nat pi g jijawul wo i ha wahmud. T mu'i hemajkam ab wo ha wohog el. <sup>2</sup>Hegam mat chum hekid wo ha iattogidad at pi wo sha'i e kudutad heg hekaj nat pi ged hu wabsh wo i ha ap'et. <sup>3</sup>Idam o ha mashcham mo d pi ap'ekam mat wo e hohont ch ep pi ha hiwgid mas wo ko'ad

g has mahs ha'ichu hugi. K eda wehs ihda d Jiosh nahtoi ch am wa s-ap'e am t-wehhejed. Ahchim mach s-mahch g wohokam att hekaj ab wo ho'ige'el g Jiosh k ab wo ui g nahtojj. <sup>4</sup>Jiosh at wehs ha'ichu nahto. K wehs s-kehgaj. Tt hekaj ab wo i ho'ige'id k ab wo ui. <sup>5</sup>Bo kajj g Jiosh mat g ho'ige'idahuna am wo i ap'ech nenaj ed.

**Mamt has masma d wo s-ap piongajk g Jesus**

<sup>6</sup>Dapt wo s-ap'ekam piongajk g Jesus Christ mapt am wo i ha ahgi g t-wehm wohochuddam ihda ha'ichu mashchama. Kupt an wabsh s-ap wo u'ukchid g e-wohochudadag ch wehs ha'ichu mashchama ab amjed map hab hi wa masma hab e wua.

<sup>7</sup>Pi g am hab masma hekaj g hoho'oki a'agida mas d Jiosh ha'ichu ahga. Pi at hab wo em-juh mamt wo s-a'ap'ek am Jiosh nena ed. Am apt wo si e mashchamad mapt am hab wo junihid s-ap'ekam himdag.

<sup>8</sup>S-ap'e mapt wo e momoisha k wo s-gewkk. K wabshaba ab him g tash mat wo huhug ihda. K heg hekai ba'ich i s-ap'e mapt wo i e gewkai am e-wohochudadag ed. Id o ab m-mahkch g s-ap'ekam doakag idani ch imhab i ba'ich. <sup>9</sup>Do si wohokam ihda ha'ichu ahga. K hab chu'ig mat wehs ab wo i chum s-e wohoch. <sup>10</sup>Jiosh at wehs wo ha do'ibia hegam mat ab wo i s-wohoch g ha'ichu ahgaj k am wo i e gewpkai wui. Kuch ab s-wohochud ch heg hekaj am si t-nakog ch mu'i ha'ichu ab

nakog matt wo ha ahgi hemajkam ab amjed ihda. <sup>11</sup>Am g i ha mashcham ihda mani m-ahgid k ab i ha chehani mat am hab wo junihid. <sup>12</sup>Bapt masma s-ap hab wo e junihid ch s-ap wo neokad. T pi hedai pad has wo m-elidad map d wabsh wechij hemajkam. Ab g si pihk e elidad wehs ha wui ch wo si e nuhkudad ch pi hab wo junihid g pi ap'ekam. T hab wo e chehgidahid g em-wohochudadag. <sup>13</sup>Am g i e nakog mapt am wo wa ne'okchulidad g Jiosh ha'ichu ahga am ha-namki ed ch wo ha mashchamad ch am wo i ha gewkemhunad. <sup>14</sup>Neh, ha wanimeddama at was e ho'ige'idahu m-wehhejed k ab m-taht. T wa hegam mo d Jiosh ha'ichu i tashogiddam am ah mat has mahs chikpan ab m-mah g Jiosh. Pegih, am g i e nakogad ch heg am hab wo junihid. <sup>15</sup>T hab ab wo i e gewkemhunad g wohochuddam an m-neidch. <sup>16</sup>Si g s-e nen'oid map has e junihim ch haschu ha mashcham k hekaj pi wabsh wo heki wua g e-doakag. T hegam mat ab wo m-kaiha hab wa'ap pi wo heki wua g e-dodakag.

**Matt has wo chum t-junihid am ha wui g t-wehm wohochuddam**

**5** Pi g ab wabsh si chehmod g keli o'odham k wabshaba ab wabsh wo s-ap ha'ichu kakke hab masma mapt g hejel e-ohg hab chum masma hab wo juhkchid. Wechij o'odham apt hab masma ab wo ha neidad mo d m-wepnag. <sup>2</sup>ch g o'oki hab masma map g e-je'e ch g wechij u'uwi hab masma mo d

m-u'uwiga. Pt wabsh si s-ap wo ha chegitokad.

<sup>3</sup>Am g ha ahgid hegam mo am hemiap e mihshmad mat wo ha nuhkud hegam mo d si hehe'ejel wi'ikam u'uwi. <sup>4</sup>K wabshaba pi ab hu ha ab mas wo ha nuhkud hegam mo ge a'aliga. Idam ha-a'aliga at wo chum ha nuhkud nat pi ha ge'egel. K d Jiosh tatchui mat aigo epai wo i ha wehmtad, <sup>5</sup>Hegam mo woho d si hehe'ejel wihpkam o heg ab wa'i hiwig Jiosh ch chum hekid ab tahni g i wehmtadag. Idam amt wo ha nuhkudad <sup>6</sup>ch wabshaba wabsh wo ha dagito hegam mo wabsh e gahgid g s-tahhadkam. <sup>7</sup>Neh, pt wo ha ahgi hegam mo e wehm mihshmad mat hab wo juh ihda mani m-ahgid. T hab pi hedai has wo ha ahgad. <sup>8</sup>Hegam mat pi wo ha nuhkud g e-hajuni o ba'ich d i pi ap'ekam mo g mischini.

<sup>9</sup>Pi at an hu wo ha ui g wechij u'uwi mat wo ha nuhkud. Hegam mat wo i ha wehmtad at wo aisk g chuhdpo wehst-mahm a'ahidag ch d wo hegamk mo s-ap e nuhkudahim g e-kunbad wehhejed <sup>10</sup>ch s-ap ha ge'egel g a'al ch s-ap ha nuhkud g Jiosh wohochuddam ch wehsko s-e mahch mo ha'ichukaj i ha wehmt hegam mo tatchua g i wehmtadag, chum as hems pi d wo ha-machigak.

<sup>11-12</sup>Wechij u'uwi atp hems ep wo s-kuhkuntam mo eda hab chum kaj mat pi hab wo e juh k wabsh wo chikpani g Jiosh, neh, k hab masma wo e chu'ijigchud k gam hu hab wo i e juh ab amjed g Christ. <sup>13</sup>Ha'i atp hems wabsh wo s-e papadmakamch an oiopodch ha-kihki oidch, wahn ba'ich i pi ap'e mat wo mai g has

ahgadag k an wo gantanad g pi kehg ha'ichu ahga. <sup>14-15</sup>Ha'i at heki hu hab masma hab e juh k am i oi g Jiawul. Id o hekaj ba'ich i a-ap'e mat g wechij u'uwi ep wo kuhkunt k wo mahmadt k wo s-ap dagio'i g e-kihdag. T heg hekaj g t-obga pi wo e nako mas wo pi ap has t-ahgad.

<sup>16</sup>Am g ha ahgid g u'uwi mat wo i ha dagio'i g hehe'ejel wihpkam e-hajuni k pi ab hu hedai wo mohto'i. Hegam mo am hemiap e mihshmad at hegam wo wa'i ha dagio'i mo d si hehe'ejel wihpkam

<sup>17</sup>Am g wehs ha ahgid mat ab wo si has i ha elidad hegam mo d kekel em-wanimeddam ch s-ap am hab junihim g e-chikpan, wahn hegam mo si chikpan ch hab junihim g mashchama ch mihshmda. <sup>18</sup>An o o'ohanas Jiosh heki hu o'ohana ed:

Pi g an hu wo bishdad g woiwis chini mat wo kehimunad g ha'ichu em-bahidag.

T am wo wa ha kamshshapad g ha'ichu em-bahidag.

*Deuteronomy 25:4*

K hab d ahga ihda mamt hab wa'ap wo ha namkidad hegam mo hab junihim g chickpan, chum hems g Jiosh pionag.

<sup>19</sup>Pi g ab hu kaiham g ha'ichu abchuda ab hema i ha ab idam kekel, heg hi wa mat gohk o waik hab wo chei mo si s-ap s-mahch ha'ichu ab ha amjed, mt am haha wo i mamche.

<sup>20</sup>Am apt hemajkam ha kailid k wo si s-ha keh'el hegam mat hedam pi gam hu wo dagito g pi ap'ekam. T hab masma wo s-e gihugad ha'i ehp.

<sup>21</sup>Am g wehs wepo masma hab ha juhni idam mani m-shelinid k pi

hedai sha'i gam hu wo i gawulkai. Id ani si s-bahbagi ab m-chehani am ha tahgio g Jiosh ch Jesus ch am ha tahgio g hekia s-ap'ekam anghil.

<sup>22</sup>Pi g am wabsh si s-e hohtkid mapt am wo hema i kei mat wo chikpani g Jiosh. Tp hems d pi ap chu'ijkam. Kut d wo m-chu'ijig mapt s-hohtam am i kei. <sup>23-25</sup>Ha'i o g pi ap ha-chu'ijig am tasho e neid. Kum s-ap s-mahch ch pi woho am hu wo i ha chuhcha idam. K wabshaba ha'ijj pi am hu tasho e neid g ha-chu'ijig. Mt heg hekaj am wo si i ha mamche mamt hedai am wo i ha chuhcha. (25) K hab wa masma g s-kehg ha-chikpan am tasho e neid. Chum as hi wa pi am hu i si tasho ch wabshaba pi wo ehsto g s-kehg ha-chikpan imhab i ba'ich.

(23) Neh, s-e g nen'oidk, Timothy. Pi o kehgaj g shuhdagi amai. Kupt am wo sha'al wehnad g nawait. T hab pi wo m-mumkichudad hegai shuhdagi.

**6** Hegam wohochuddam mo d nenehol at ab wo si has ha elidad g e-a'amo. T heg hekaj pi hedai wo has ahgad g Jiosh ch pi wo has ahgad g t-mashchama. <sup>2</sup>Hegam mo g ha-a'amo hab wa'ap d wohochuddam at ba'ich ab wo i si has ha elidad ch ba'ich i s-ap wo ha chikpani nat pi g ha-chikpan d wo ha-ap'edagk g ha-wehm wohochuddam.

**Matt pi heg wa'i lialkaj  
wo si pihk t-elidad**

Id apt hemho wa wo i ha mashcham k hekaj wo ha mihshmad mani wa m-ahgid. <sup>3-4</sup>Ho

o wabsh chum si e hahaschud ch d wabsh pi ha'ichu mahchim hegam mat hedai i pi heg hekaj wo ha mashcha t-kownalig Jesus Christ mashchama. Heg o d wohokam t-mashchama ch am t-tashogid g s-ap'ekam himdag. K idam wabsh tatchua mat wo ha ne'owinad ch wo ha kawnid. Id o wabsh i wahmud g hehgamdag ch bagatalig ch pi ap has ahgadag. <sup>5</sup>Kut hegam wo ha kawhainad matp hedam pi ap ha'ichu chegito ch pi mahch g wohokam ch hab chum elid mat g o'odham wo s-e kaisch id hekaj t-himdag.

<sup>6</sup>K wabshaba id d s-wohokam s-t-kaisdag matt wo himad g s-ap'ekam ch wo si s-ap t-tahtkkad, chum achs pi ha'ichu wo edgidad. <sup>7</sup>Pi ach ha'ichu sha'i u'ad ch in mahsi id dahm jewed ch pi ha'ichu sha'i be k wo hih. <sup>8</sup>Heg o am wa chum s-ap'e am t-wehhejed matt ab wo wa al he'es ha'ichu ko'ad ch ab s-ap wo t-enigadadch. <sup>9</sup>Hegam mo s-e kaischudamk at heg hekaj hab wo s-junim g pi ap'ekam. T g ha-tatchui gam hu hab wo i ha juh ab amjed g Jiosh. Kut ha'i ep wo ha padch. <sup>10</sup>Nahnko mahs pi ap'ekam o ab shohshon heg amjed mat hema heg wa'i lialkaj wo si pihk e elidad. Ha'i at heg hekaj im hu hab i e juh ab amjed g e-wohochudadag k oi wa mu'i ha'ichu pi ap tahhadkam ab nako.

**Ha'ichu i shelinida am Timothy wui**

<sup>11</sup>Pi g hab masma hab e juhni mo hegam mani am ha ahg nap pi d Jiosh chikpandamga. Id apt eda am wo i e nako s-ap'ekam

ch e-wohochudadag ch pihk elidadag ch ha'ichu nakogadag ch hemajimalig mapt wo wepo chu'igk mo g Jiosh. <sup>12</sup>Am g si e gewkad wehhejed g Jiosh k wo s-wihnam u'ukchid g e-wohochudadag mapt hekaj am wo i wah Jiosh kihdag ed hab masma mat g s-melidkam hab wo e juh mat wo ha gehg.

Id at hekaj ab i m-bei g Jiosh mapt wa am si s-kehg ah g e-wohochudadag am mu'i hemajkam ha kaichudk. <sup>13-14</sup>Bapt wabsh masma hab wo e juh matsh wa g t-kownalig Jesus natsh pi heg s-ap ah g wohokam am tahgio hegai ge'e kownal mo hab chehgig Pontius Pilate. Kupt wehs am hab wo juh ihda mani m-ahgid k ab wo ai mat ab ep wo i hih g Jesus. T hab pi hedai ab hu ha'ichu wo m-chu'ijigch. Id ani ab si m-chehani am tahgio g Jesus ch am tahgio g Jiosh. Jiosh o ab ha mahkch g doakag wehs ha'ichu dodakam ch ab ep wo i m-wehmt mapt hab wo juh g ni-chehanig.

<sup>15</sup>Jesus at ia ep wo i e chehgi heg i tash ed mo kehshch g Jiosh. Jiosh o si s-hemajima ch wehs ha'ichu nuhkud ch d kownal wehs ha dahm g kokownal. <sup>16</sup>ch pi hekid ha mumkku. Pi o hedai neid ch pi

hedai wo e nako mas wo nei. An o ha'ichug hab mahs tonlig ch ed mat pi hedai wo e nako mas ab wo miabi. Pi at hekid wo huhug g gewkdaj. Kutt ab wo si has elidad chum hekid. Neh, bo masma.

<sup>17</sup>Ab g i ha chehani hegam mo d s-kakais mat pi wo si e hahaschudad heg hekaj ha'ichu e-eniga ch pi ab hu wo hiwgad ch wabshaba ab wo hiwgad g Jiosh. Heg o wud mo s-ba'ama ab t-mahk wehs ha'ichu mach haschu i hekaj s-ap t-tahtk. <sup>18</sup>Ab g i ha chehani mat am hab wo i junihi g s-kehg chikpan ha wehhejed hegam mo tatchua g i wehmta k pi wo chu da'ad ch wo ha'ichu ha ho'idad g sho'igkam. Id o d woho s-kaisdag. <sup>19</sup>Bo masma heg wa wepo mo e to'idahim g s-namkig ha'ichu an dahm kahchim ch ed hekaj wo si s-ap tahtkkad chum hekid.

<sup>20</sup>Si g s-ap nuhkud hegai mamt ab m-nuhkudach. Pi g am hu ha wehmajk hegam mo wabsh pehegi e ne'owin heg hekaj mo hab chum elid mo d ha'ichu mahchig. Id at pi wo sha'i i t-wehmajk matt ba'ich i s-ap wo s-mai g Jiosh. <sup>21</sup>Ha'i o hab chum e ahg mo edgid ihda mahchig ch oi wa wabsh heb hu wua g e-wohochudadag.

Neh, Jiosh at wo wa s-m-ho'ige'el.